

文言
小说

夜谭随录


〔清〕闲斋氏著

岳麓书社

文言
小说

夜谭随录

〔清〕闲斋氏著



岳麓书社

责任编辑：陈戍国
装帧设计：林明深 周旭

夜谭随录

清·闲斋氏 著

岳麓书社出版（长沙市展览馆路14号）
湖南省新华书店发行 湖南省新华印刷一厂印刷

1988年1月第1版第1次印刷

字数：210,000 印张：10.375

统一书号：10285·53 定价1.70元

出版说明

《夜谈随录》，清代满洲人和邦额作。和邦额，字闲斋，号霁园主人，故此书著者旧署“清闲斋氏”（或题“霁园主人闾斋氏”）。其生卒年月，各家都未作具体考证。现据本书《自序》中有“予今年四十有四矣”一语，而末署作序时间为“乾隆辛亥夏六月”，乾隆辛亥为乾隆五十六年（公元1791年），以此推算，他的出生当为清乾隆十二年（即公元1747年），其卒年当在乾、嘉年间或稍后。

此书版本颇多。各种通行本（如上海新文化书社本、上海进步书局本等）鲁鱼亥豕，所在多有。此次付印，努力作了一些改正，并删除了《白萍》一篇中过于庸俗的少量文字。疏漏之处，仍恐不免，请读者指正。

本书内容，多讲述狐鬼妖异，于当时政治黑暗、社会动乱所造成的怪异现象亦间有反映。如《梨花》述说当时“女价十倍于男”，“迫于饥寒，父母鬻子谋朝夕”，竟以稚儿乔装为丫鬟出卖于官家；《米芾老》说的则是康熙年间总兵叛乱，叛军掳掠妇女，不问老少美丑，“悉贮布囊中，四金一囊，听人收买”。也有野史性质的资料，如《倩霞》所揭露的康熙朝靖南王耿精忠的荒

淫秽史，实足骇人听闻。他如《地震》、《怪风》、《蜃气》等原属自然现象。其中不少反映人情世态冷暖炎凉之作，颇为深刻。民间封建迷信和因果报应之说，不时流露于篇，以寓劝善惩恶之意，显见作者儒释道思想的杂糅，读者自能识辨。

鲁迅先生《中国小说史略》谓本书“颇借材他书（如《佟麟角》《夜星子》《痲医》皆本《新齐谐》），不尽己出，词气亦时失之粗暴，然记朔方景物及市井情形者特可观”。

一九八五年元月

自序

子不语怪，此则非怪不录，悖矣；然而意不悖也。夫天地至广大也，万物至纷赜也，有其事必有其理，理之所在，怪何有焉？圣人穷尽天地万物之理，人见以为怪者视之若寻常也，不然，凤鸟、河图、商羊、萍实，又何以称焉？世人于目所未见，耳所未闻，一旦见之闻之，鲜不为怪者，所谓少所见而多所怪也。苟不以理穷，则人生世间，无论天地万物之广大纷赜也，即一身之耳、目、口、鼻、言笑、动止、死生、梦幻，何者非怪？不求其理，而以见闻所不及者为怪，悖也。既求其理，而犹以见闻所不及者为怪，悖之甚者也。予今年四十有四矣，未尝遇怪，而每喜与二三友朋于酒觞茶榻间，灭烛谈鬼，坐月说狐，稍涉匪夷，辄为记载，日久成帙，聊以自娱。昔坡公强人说鬼，岂曰用广见闻，抑曰读虚无胜于言时事也。故人不妨妄言，己亦不妨妄听。夫可妄言也，可妄听也，而独不可妄录哉？虽然，妄言妄听而即妄录之，是亦怪也。则《夜谈随录》即谓为志怪之书也可。

乾隆辛亥夏六月霁园主人书于蛾术斋之南窗

夜谭随录目录

卷一

崔秀才	(1)	碧碧	(7)	梨花	(11)
香云	(14)	龙化	(23)	李翘之	(23)
洪由义	(24)	某僧	(25)	邵廷铨	(26)
卖饼翁	(29)	苏仲芬	(31)	红姑娘	(34)
陈宝祠	(36)	张五	(39)	阿凤	(41)
娄芳华	(46)	噶雄	(49)	刘锻工	(52)
蝟精	(53)	小手	(54)	屙气	(55)
清河民	(56)	王京	(56)	诡黄	(57)
梁生	(59)	某倅	(65)	倩霞	(69)
落溲	(74)	伊五	(75)	段公子	(77)
戇子	(80)	某马甲	(82)	米芎老	(83)
韩生	(85)				

卷二

修鳞	(87)	来存	(92)	杂记	(95)
韩樾子	(103)	永护军	(109)	朱外委	(110)
铜人	(111)	某掌班	(112)	尸异	(113)
红衣妇人	(113)	阿稚	(114)	闵预	(119)
章泌	(123)	麻林	(126)	怪风	(127)
张老嘴	(128)	大眼睛	(128)	柏林寺僧	(128)
薛奇	(129)	塔校	(129)	吕琪	(130)
高参领	(130)	某诸生	(131)	潘烂头	(132)
癫犬	(133)	嵩梁篙	(134)	懒贿	(134)
烽子	(135)	陈景之	(136)	陈守备	(136)
青衣女鬼	(137)	汪越	(138)	春秋楼	(143)
棘闹志异	(144)	回煞	(154)	夜星子	(157)
尸变	(159)	猫怪	(161)	驴	(163)
异犬	(164)	那步军	(165)	施二	(166)
盛紫川	(168)				

卷三

邱生	(169)	陆水部	(181)	冯懿	(184)
戴监生	(188)	佟觭角	(191)	谭九	(193)
陆珪	(196)	白萍	(199)	刘大宾	(203)
庄斲松	(204)	额都司	(206)	孝女	(208)
请仙	(210)	某太医	(212)	地震	(213)
朱佩茝	(214)	纸钱	(215)	三李明	(215)
霍筠	(217)	赵媒婆	(226)	三官保	(229)

倩儿	(233)	襁襪	(237)	白衣怪	(238)
某领催	(239)	宋秀才	(240)	护军女	(241)

卷四

秀姑	(245)	玉公子	(252)	萤火	(258)
柴四	(260)	吴哲	(263)	周琰	(265)
傻白	(266)	孛生	(267)	某王子	(269)
再生	(271)	王侃	(272)	台方伯	(277)
瓦器	(277)	梁氏女	(278)	铁公鸡	(278)
多前锋	(281)	骷髅	(282)	姚植之	(282)
新安富人	(283)	维扬生	(286)	市煤人	(287)
鼠狼	(288)	巨人	(289)	白莲教	(289)
鬼哭	(291)	袁翁	(292)	堪輿	(293)
尤大鼻	(295)	董如彪	(299)	某别驾	(305)
双髻道人	(307)	阮龙光	(310)	某太守	(312)
邓县尹	(314)	靳总兵	(315)	藕花	(316)
王塾师	(319)				

夜谭随录卷之一

崔秀才

奉天先达刘公，未遇时，故世家子。少倜傥好客，挥霍不吝，车马辐辏，门庭如市。行路者健羨，虽齐之孟尝、赵之平原，不是过也。

忽有崔元素者，投一刺，刘接见。询其邦族，曰：“山东临朐秀才也，游都门二十年矣。闻公喜结纳，来作食客耳。”刘大悦，与之往来，亦时济其薪水。崔率十余日一至，至必有所借贷，家人悉厌贱之，刘独不以为琐，每如其愿。未尝违拂。如是者二年余。

刘迭遭大故，资产荡尽。又三年，一贫如洗，更屡试不第。亲故白眼相向，动辄得咎，传为口实，渐至不相闻问；婢仆逃散，并有心作罪以求去者接踵，仅存一老仆。内则一妻一女一子，鼎足而三焉。会腊尽，牛衣尘甑，无以卒岁。女能诗，戏吟曰：“闷杀连朝雨雪天，教人何处觅黄绵。岁除不比逢寒食，

底事厨中也禁烟？”刘见之，笑曰：“此际玉楼起粟，若可煮食，足够一饱。今得汝诗，能不令人羞耶？”因和之曰：“今年犹戴昔年天，昔日轻裘今破绵。寄语东风休报信，春来无力出厨烟。”

妻怒之以目，曰：“往日良朋密友，有求必应，啜汁者岂止一人。今年尽岁逼，吃着俱无，犹不少思筹策，乃合儿女子作推敲丑态，想亦拚得饿死，故预作《薤露》挽歌耶？”刘曰：“然则欲我做贼去耶？”妻曰：“做贼亦得，第恐君无其才耳。顺城门外朱知县，方其落拓时，与汝为莫逆交，一日不见，亦不能耐。今闻其丁艰在家，宦囊颇厚，诃不能走一简，聊济燃眉耶？”刘曰：“微汝言，吾几忘之矣。”亟作书，遣老仆往投之。日暮赤手回，入门即骂曰：“丧心人不必复与相识矣！始而阖人辞以他出，我则不信。既而送客在门，相见两眼棱棱。持书而入，再四促之，始传语，言事忙不暇修复，但借口致意，主人现在凡百需费，囊无一文，正愁无处措置，断难如命云云。似此丧心人，若复与相识，名节扫地尽矣！”刘企望一日，满拟必获如意，骤闻此变，不禁索然。

妻哂曰：“莫逆交不足恃矣，然总角之交，应非泛泛也。城北杨君，非与君为总角交乎？”刘以为然，复走柬以干之。杨辞以生意淡泊，本利盈亏，无囊可解。

刘拊髀叹曰：“面朋口友，固不足怪。欲明通财之义，非道义之交不可。”乃挑灯作札，罄吐肝膈，翌日付老仆持送南城靳公子。靳世胄阔阔，田园遍畿辅。公子与刘为世交，又属至戚，每当晤对，夜以继日，所讲论非忠义大节，即出世大道，互相诱掖，不啻同胞，所谓立脚不随流俗，留心学作古人者。阅札

即刻复答，谓：“叨在知己，亟当如命，奈心与力违，束手无策。君但勉为尚志之士，无自暴弃，又何忧贫贱哉！且天生刘君，必非碌碌者，君姑待之，保有大富贵日也。第好义如弟者，值此危急之秋，竟坐视良朋之困，不能一援手救，殊堪自愧，唯知己者谅之耳！”刘忿，掷书于地曰：“荷荷！平日披肝胆，谈道德，何啻羊、左、任、黎？每举一子一女，犹以百金为寿，今急切相需，乃不破一文，乃反以肤词迂说相敦勉，所谓道义之交，固如是乎？”

老仆慰之曰：“主之朋友，大概未曾交得一人。亲戚中不乏富贵者，盍拚一失色，与之通融？”刘叹曰：“朋友列五伦之一，尚三呼不应，琐琐姻娅，又何望乎！”

言次，闻门有剥啄声，报崔秀才来矣。妻曰：“呸！人家潦倒至此，彼尚欲来割瘦胫耶？那知并胫也无，即欲来割，正恐无下刀处。”刘曰：“不然，此空谷足音也。”延之入。崔曰：“刘君纵理不入于口，而乃一寒如此哉！昔日之繁华，真耶幻耶？今日之索寞，幻耶真耶？鼯技易穷，青松落色，槿心朝在，夕不存矣。尚有一人肯杖策踵门，如崔元素者否？”刘曰：“夙昔自谓盟车笠，订金兰，得一二耐久朋，为终身胶漆，不意翻覆若此，不敢复言交游矣！”崔曰：“不然。夫廉将军免官客去，翟廷尉复职客来，人情自昔然也。君自不达，夫何怨尤？智者当务之为急。为今之计，当奈何？”刘曰：“束手待毙耳。”崔笑曰：“出此言，当罚醵矣。吾闻负重涉远，不择地而休；累重家贫，不择禄而仕。盍投笔从戎，聊博升斗，不犹愈于托钵向人，受守钱虏之轻薄乎？”刘曰：“峣峣者易缺，皎皎者易污，非所以自完也。”崔

曰：“外以笔耕，内以针褥，亦可免冻馁。”刘曰：“局促效辕下驹，夙所羞也。”崔曰：“奇货可居，垄断可登，鸟兽之羽毛可织而衣，其遗粒足食也。贪贾三之，廉贾五之，盍为贾？”刘曰：“覬觐分毫，锱铢必较，素所鄙夷而弗屑者也。”崔曰：“然则度君之心，量君之志，欲更扬眉吐气，非官不能矣。欲为官，须登第；欲登第，须理旧业读书；欲读书，须膏火之费：吾视君皆未易办也。吾有钱八十千，可辇至。”刘曰：“君方同病，诘忍波累？”崔曰：“人弃我取，人取我予，夫何辞焉！”遂言别。移时，以车辇八十千至。刘大感谢，欲备一餐相款，崔不坐而去。迟数日，复提一囊至曰：“君曾肄业否？”刘曰：“新正伊迩，未免匆忙。”崔曰：“予思八十千，岂敷撙节之用？更蓄得一囊金，为君谋小康。”亟置之炕头，便出门，挽之不及。试启囊，灿然尽赤金也，一室俱惊，权之，三百两。崔从此不复至，更不识其居处，徒铭感而已。

出资购第宅，赎旧产，又于新居掘得窖金二瓮，遂成富室，僮仆去者，次第复来，百计夤缘，以求收录。亲友亦稍稍通庆吊。一年之间，繁华如故。刘不复好客，惟闭户下帷，日夜占毕。是年及第，官清要，贺客日盛。

值初度，预使人四出，凡亲故中之贫窶落魄及不能举火者，尽招致之。及期，亲友毕集，竞出金玉锦绣，罗列满堂，为刘祝嘏。刘乃张筵高会，酒再巡，罢乐，出席，举觞属客，悉出所得，分赠诸贫贱之前，使各收贮。众愕然，不测何故，金曰：“凡兹不腆，实所以奉祝长年者，纵不足贵，亦诸亲友之芹献也，曷为散之？”刘叹曰：“今日何幸，群公臻至，锡我百朋，所恨座

中唯少崔秀才一人耳！崔若在，必能知我之为此举也。”因袖出一笺，则五言古诗一章也，命其子朗诵以示众曰：“主人好施与，挥霍无踌躇。客有谏之者，主人笑曰毋。君谓财可聚，我意财宜疏。不暇为君详，聊以言其粗。财为人所宝，人为财之奴。富者以其有，贫者以其无。有则气揄扬，无则气不舒。揄扬人愈亲，不舒人不知。昔我贫贱时，颠踣无人扶。有身不能衣，有口不能糊。贵戚与高朋，相逢皆避途。居然一厌物，俨若非丈夫。今日奋功名，食禄复衣襦。门庭闹如市，势利日以殊。一寿千黄金，一箸万青蚨。奢穷欲亦极，无劳用力图。当时何其嗇？今日何其都？顾兹亲串惠，岂我所愿乎？昔贫今且富，昔我即今吾。清夜维其故，反侧心踟蹰。其故良有以，今昔人情符。周急不继富，圣言不可诬。忆昔齐晏子，举火贍葭苻。又闻范文正，义田置东吴。设使天下人，能聚复能输。在在无和峤，处处有陶朱。流过阿堵物，何来庚癸呼？堪叹近富者，唯利之是趋。满盈神鬼恶，往往寄祸沽。用是常自惕，羞为守虏徒。况今得之如泥沙，当日求之无锱铢。君不见栖栖穷巷孤寒儒，此时此际如苦荼！”众闻之，无不赧然，如芒在背，多有逃席而去者，亦不追挽。

俄报崔先生至矣，刘倒屣左辟鞠之。崔握手而笑曰：“君可谓国狗之瘦，无所不噬矣，奈何效杜子春口舌为？且繁华索莫，其衍几何？苟不齐之，魔障欵起矣。彼接舆髡首，桑扈裸行，倏来忽逝，岂屑屑於菀枯隆杀哉！会尽人情，点头亦属多事耳。”刘再拜曰：“至味之言，敢不佩为弦韦？”

是夕客散，独留崔宿，妻子亦出拜之。刘曰：“近日徙居何

所？胡久不一至？致缺酬报。”崔曰：“昔者悉索君，君时亦望报否？”刘曰：“实无是心。”崔曰：“然则予独有是心哉？何不恕也？”刘大笑，因问家中更有何人。崔曰：“颇不孤子，子女孙曾数十矣。”刘欣然曰：“小女未字，以归君家何如？”崔曰：“此大不可也。”刘力诘问之。崔支吾良久，始吐实曰：“君长者，言亦无害。所不敢与君结婚者，自愧非人，实艾山一老狐也。以君抱奇气，故不远千里来相结纳。致君贫而再富，亦定数，非吾之力。譬如作室，既镇其薨，又何加焉？吾特因人成事耳。今俗缘已了，即当长辞故人矣。”刘始大悟，不觉洒然，曰：“君去固自得矣，将无使吾为忘筮忘蹄之人哉？”崔曰：“予非贪天功者，君何感焉？从此前程皆顺境矣，官不过三品，而富则十万。虽然，詎无一言为留别之赠？吾闻人心不同，有如其面，豫樟二木，七年乃知。知人之鉴，不易明也。甘以坏何如淡以成，毁方而瓦合，全交之至言，君其志之，勿为雉犬所笑。”言迄，辞去，永不复至。

刘后官至臬司，以老告归。感崔之谊，朔望祀以香楮，终身不衰。

闲斋曰：戔戔之俗，万变千更，交固不易言也。方其盛也，面朋口友，不招自来；及其衰也，迹合神违，百无一应。除毁方瓦合一道，诚无良法矣。胸中自有泾渭，皮里自具春秋。故穰穰而来，茕茕独往，交可以始终一也。不然，直欲尽化同人为异物，易济济为绥绥，有此理哉！

兰岩曰：富贵则趋附之，贫贱则违避之，俗情概然。然曾无一人矫然独出，而仅让此狐。人而不如狐也，良可愧也。

碧 碧

周至诸生孙克复，流寓阶州。爱其地土腴水甘，卜筑山村，耕读自乐。屋左依山临壑，构一草阁，颇虚敞，可以眺远。阁下林深箐密，虽有一径，人迹罕经，仅过樵牧。

一日，孙独凭阁上，远远见一人循径来，草笠布衫，仿佛甚美。既辨眉目，果美甚，丹唇皓齿，华发素面，十七八一变童也。孙骇曰：“世岂有男子而姣媚若此者乎！”亟趋下阁，要遮而鞠之曰：“山深路僻，豺狼旡旡，小郎日暮孤行，进将安止？盍姑住此，明旦早行，庶不至旁观者代为忧虑。”少年曰：“夙非姻娅，生熟两不相谙，猎食或然，宿应不可。”孙素有断袖之癖，一旦值此璧人，欲情火炽，遽前拥之。少年大惊曰：“奈何邂逅相遇，辄以横逆见加？”孙曰：“卿慧人也，何待解人？”少年遑遽，极力挤之，孙猝不及防，失足坠岩下。少年脱然去。

孙为一树枝夹住，欲上不能，欲下不得，呼叫声嘶，无人知者，自拚必死。忽一女子过而见之，讶曰：“如此陆危，何乐而为之？”孙曰：“为人所算耳。能救我否？”女曰：“救亦非难，第未识何以报德？”孙曰：“除却再夹树枝，余悉唯命。”女吃吃笑，解足缠，抛与一端，援之而上。孙良久神定，整衣谢之。女徐徐束足，了不见答。孙方怪其倨，审谛之，则苗条婉妙，绝代美姝也，不觉缩颈吐舌，且惊且喜，阴念：“何今日奇遇之多也？”

时日已薄崦嵫，四山渐暝，乃再拜而请曰：“再生之德，未

易仓促图报，幸小住为佳。”女笑而睨之曰：“子大不良善，甫得生机，又造死业矣。”孙听其言谑，窥其意厚，大不似少年漠不关心者，遂携入阁，缱绻备至。约三更，女披衣起，曰：“今夕与人约，须践之，翌日重晤。”孙阻之以臂曰：“卜夜未卜昼。”复留与乱，因诘：“卿孱弱处子，虽乘以油壁，舁以笈舆，犹恐不胜劳瘁，底事单形只身，远陟空山，令人弥思弥惧，中心能无稍怖乎？”女自言：“宓氏，字碧碧，年十八，嫁前村方氏子，半年而寡。今日为母寿归宁，来此捷径，不意遇子，不能自贞，诚夙分也。愿与子偕老，俾载螯有托，莫见弃否？”孙愀然曰：“得卿为妇，小可何修哉！但碍有老母，赋性方严，出入小闲尚须咨白，不告而娶，实不敢专。然而父母爱子，未必苛求，见卿可人，应无不纳，容徐图之。”女曰：“儿于子亦非无益者。子果肯降心相从，终始不二，则可以全性命，了死生。夜气之牾亡，旦夕可复。俾子蜕蜣丸而为蟹蚶，化腐草而为夜光，必当同为人极之游，不复羁滞形骸，听阎摩罗什天尊为政矣。”孙大喜，相见恨晚。

晨兴，即以告母。母呼女至前，反复详讯，乃谓孙曰：“儿勿草草。吾闻颜朱眸绿，尤物蛊人，倾万乘之国尚有余，祸匹夫之身庸有不足？老身七十矣，所见闺秀何啻千万，至若此之穷妖极艳，一见炫人心目者，实为乍睹，真祸水也。汝何德以堪之？且天方氏之子，不祥孰甚？可急遣之，勿速死亡！”孙默然鹄立，面如死灰。女进曰：“姑之见亦左矣。儿非自媒者，诚以藜苦不如荠甘，故腆颜自荐。儿不厌郎贫，姑奈何畏儿蛊乎？”母曰：“不然。小娘恋新欢，忘旧好，钟情者固不得不然；而老